

NİZÂMNÂME-İ ESÂSİ

FASL: 1

Maksad-ı Teşkil

Madde:1-İstanbul Erkek Lisesi talebe-i kadimesiyle müdâvimini meyanında mümâresât-ı bedeniyenin ta'mim ve terakkisine hâdim olmak üzere "İstanbul Spor Kulübü" ünvanı tahtında İstanbul'da bir cemiyet tesis edilmiştir.

Madde:2-Maksad-ı teşkile muhâlif olmak itibarıyla kulüpte kumar oynamak, içki içmek, mugâyir-i adâp ve iffet-i harekâta bulunmak ve siyasetle iştigal etmek memnu'dur. Hilâfına hareket edenler heyet-i idâre kararıyla kulüpten ihrâç olunur.

FASL: 2

Kulüp Azâsının Evsâfiyla Tâbi Olacakları Şerâit

Madde:3- İstanbul Spor Kulübü'ne aza kayıt olunabilmek için zîrdeki şerâiti hâiz olmak lazımdır.

a-) Cemiyetler Kanunu madde-i mahsusuna tevfikân azadan aranılacak evsafa mâlik olmak [yani hukuk-ı medeniyesine sahip ve cinayetle mahkum olmamış olmak ve sını [yaşı] on sekizden dîn [küçük] bulunmamak.]

b-) Spor nokta-i nazarından yaşı had-ı nizamiyesine dahil bulunmak, bu vasfı haiz bulunmayanlar müteallim sıfatıyla kulübün bütün vesâit-i fenniyesinen ve idman teşkilatından istifade edebilirlerse de hususât-ı idareye müdahale edemezler.

c-) Amatör [heveskâr] olmak yani sporu medâr-ı maişet ittihaz etmemiş bulunmak.

d-) İstanbul Erkek Lisesi heyet-i idare ve ta'limiyesinden, talebe-i kadimesinden veya müdavimlerinden bulunmak. [12 Kânûnuevvel [1]341 tarihine kadar dahil olup da mekteple alakaları bulunmayanlar bu kayıttan müstesnadır.]

Madde:4-Azalığa kabul olunmak için heyet-i idare riyasetine bir tescil varakası imlâsı suretiyle müracaat etmek lazımdır. [Bu talepnâmede isim, pederinin ismi sıfat ve memuriyet, tarih ve mahal-i tevellüd, mahal-i ikâmet zikr olunmalı ve talepnameye hüviyet varakalarına mahsus beş fotoğraf rabt edilmelidir.]

Madde:5-Talepnâmeler bir hafta müddetle kulüp levhasına ta'lik ve heyet-i mahsusaca tahkikat-ı lazımede bulunularak azalığa kabul veya adem-i kabulü hakkında heyet-i idarece verilecek karar kendilerine tebliğ olunur.

Madde:6-Azadan alınacak kaydiye ile aidât-ı miktar-ı seneviyesi ashâb-ı maâş için iki lira kaydiye ile on iki aidât ve diğerleri yarım lira kaydiye ile üçyüz kuruş aidâttır. İş bu miktar azami olarak duhûliye ile birlikte senevi yirmi dört lirayı tecavüz etmez.

Madde:7-İstanbul Spor Kulübü azasının İstanbul mıntikasına merbut diğer bir idman cemiyetiyle alakaları olamaz.

Madde:8-Azalar müessis, asli ve hâmî olmak üzere üç kısımdır:

a-) Azâ-yı müessise iş bu nizamnameye vaz'ı imza eden yetmiş azadan ibaret olup lüzum görüldüğü takdirde iş bu miktar kulüpte iki sene müddetle bulunanlardan ve heyet-i müessisenin sülûsân ekseriyetiyle tezyid olunur.

b-) Azâ-yı asliye, spor ve heyet-i idare işleriyle bil-fiil iştigal edenlerdir.

c-) Azâ-yı hâmiye mevkiî içtimaileri dolayısıyla manen ve maddeten yirmi dört liradan fazlası için hükümetin müsaadesiyle müzâheret ve muavenette bulunanlardır.

FASL: 3

Heyet-i İdare Azaları ve Tarz-ı İntihâbı

Madde:9-Heyet-i idare; reis, katib-i umûmi, veznedar, kulüp müdürü, idman müdürü, İstanbul mıntıkasına karşı bir murahhas-ı mes'ulden ibaret olup bir sene müddetle tedvir-i umûr ederler.

a-) Kulüp riyaseti kabul ettikleri takdirde İstanbul Erkek Lisesi müdüriyetine mevdudur.

b-) Kâtib-i umûmi veznedar, kulüp müdürü, idman müdürü ve murahhas-ı mes'ul heyet-i umûmiye tarafından ve meclis-i müessisin azaları meyanından ekseriyetle intihâb olunur.

Madde:10-Heyet-i idarenin muamelât-ı idariyesini tetkik ve teftiş üzere heyet-i umûmiye tarafından ve meclis-i müessisin azaları meyanından üç kişilik bir murakabe heyeti teşkil olunur.

Madde:11-Kulüp rengi sarı siyah parçadır. Alâmet-i fârikası sarı zemin üzerinde siyahdır.

Madde:12-İşbu nizamnamenin ta'dili münhasıran meclis-i müessisinin sülûsân ekseriyetiyle kabildir.

DAHİLİ NİZÂMNÂME

FASL: 1

Teşkilât-ı İdariyye

Madde:13-Heyet-i idare azası heyet-i umumiye tarafından ve meclis-i müessisin azaları meyanından re'y-i hafî ve ekseriyetle intihâb olunur. Vekâlet muteber olmadığı gibi içtimada bulunmayan azanın hakkı sakıt olur.

Madde:14-Heyet-i idareye dahil olabilmek için iki senelik müessis aza olmak lazımdır.

Madde:15-Heyet-i idarede münhal vuku' buldukça o vazife için kongrede en çok re'y kazanmış olan müessis aza heyet-i idarece tefrik ve tayin olunur. İnhilâlin heyet-i idarenin nısfından fazlasına sirayeti kongrece tecdiden intihâb edilmesini müstelzimdir.

Madde:16-Heyet-i idare lâ-akall [en az] ayda bir defa muayyen gün ve saatte âdiyen ve lüzumu takdirinde reisin davetiyle gerek heyet-i idare ve gerek meclis-i müessisin fevkalade olarak içtima eder. Ancak fevkalade içtimalarda lâ-akall kırk sekiz saat evvel telgrafla veya imzaları alınmak suretiyle azalara ihbâr-ı keyfiyet edilmesi meşruttur [şarttır.] Üç müteakip celsede bilâ-mazeret bulunmayan heyet-i idare azası müstafi addolunur.

Madde:17-Heyet-i idare azalarının vazifeleri ber-vechi âtidir. [Aşağıda olduğu gibidir.]:

Reis: Hükümet nezdinde ve harice karşı kulübün mümessilidir. Kâtib-i umumiden maada hiç kimse kulüp namına her ne şekilde olursa olsun taahhüt altına giremez. Reis heyet-i idare müzerekâtını idare ve mukarreratının icrasına nezaret, muâmelât-ı umumiyyeyi teftiş eder. Tediye mutazammın kâffe-i evrakı veznedarla müştereken imza eder. Reis heyet-i idare içtimalarında bulunamayacağı zamanlarda vekâlet kâtibi umumi tarafından icra olunur.

Kâtib-i Umûmi: Muamelât-ı kalemiyyeyi idare eder. Muhâberâtı münferiden veya herhangi bir taahhüdü mutazammın evrakı reisle müştereken imza eder. Kâtib-i Umûmi âtideki defterleri tutmaya mecburdur.

- 1- Evrâk-ı Vâride Musannefi,
- 2- Evrâk-ı Sâdıra Kopye Defteri,
- 3- Heyet-i İdare Mukarrerât Defteri,
- 4- Kongre Zabıt Dosyası,
- 5- Azâ için Esas Künye Defteri,
- 6- Azâ için Sicil Dosya Defteri.

Kâtib-i Umûmi mes'uliyeti kendisine ait olmak üzere lüzum görürse kendisine iki muavin tayin edilebilir.

Veznedâr: Varidâtın cibâyetini taallük eden muamelâtı tetkik makbuzları tertip ve imza ile reise kulüp mührüyle temhir ettirir. Nukûd-ı mevcûdiyeyi ahkâm-ı nizâmiye dahilinde hıfz ve heyet-i idare kararına tevfikân masârıfı ifâ eder. Veznedar mes'uliyeti şahsına ait olmak ve makbuzlar imza mukabilinde ve zimmet suretiyle kendilerine tevdi olunmak üzere kulüp azası meyanından üç kadar tahsildâr intihâb ve bunların marifetiyle tahsilatı ifâ ettirebilir. Veznedarın tutacağı defterler şunlardır.

- 1- Kasa Defteri,
- 2- Tahsilât Bordroları,
- 3- Koçanlı Makbuz Defterleri,
- 4- Evrak-ı Müsbite Musannefi,

İdman Müdürü: İdmanlıların ilmi ve fenni ve bir usûl tahtında çalışıp çalışmadıklarını teftiş eder. Baş kaptanlardan mürekkep idman heyetine riyaset ve âtîde bir defa vuku bulacak içtimalarda baş kaptanların raporlarını tetkik eder.

Kulüp Müdürü: Kulübün bil-cümle demirbaş eşyasının zayiinden mes'uldür. Kulüp müdürü yalnız resmi maçlarda ancak şube başı kaptanlarının talebiyle demirbaş eşyadan şubelerine müteallik eşyaları iâdeten verir. Kulüp müdürü mes'uliyet kendisine ait olmak üzere lüzumu kadar muavin tayin edebilir. Herhangi bir suretle olursa olsun, heyet-i idarenin muvafakati istihsal edilmeden kulüp demirbaş eşyasından hiç birisi harice çıkarılamaz. Kulüp müdürü kulübün demirbaş eşya defterini tutmaya mecburdur.

Şube Başkaptanları: Şube başkaptanları şubât azası tarafından ekseriyet-i ârâ ile intihap olunur. Kendi kısımları muamelât-ı fenniyesini kısım kaptanları ile birlikte tespit ederler. Başkaptanlar müsabakalar netâyiçini ve azalarının şerâit-i sahiha ve kabiliyetlerini irâe eder. Bir defter tutmaya mecburdurlar.

FASL: 2

Muâmelât-ı Hesabiyye

Madde:18-Kulübün menba'ı vâridâtı şunlardır:

- 1- Aza kaydiyeleri ve aylıklar,
- 2- Hükümetin müsaadesiyle teberrüât,
- 3- Tahsisât-ı muhtelif,
- 4- Cemi' iânât nizamnamesine tevfikân icra olunacak müsamere vesair suretlerle elde edilen hasılat.

Madde:19-Her aza kulübe kabul edildiğini tebellüğ ettiği anda kaydiyesini vermek mecburiyetindedir. Aylıklar her ayın birinci haftası nihayetinde tediye edilmiş bulunmalıdır.

Madde:20-Mazeret-i meşruaları olmadan üç aylık taahhüdâtı ifa etmeyen azaların kaydı terkin olunur.

Madde:21-Hîn-i hacette [gerektiği zamanda] heyet-i idare kararıyla mazeret-i meşruaları bulunan azaların taahhüdât-ı şehriyeleri te'cil edilebilir.

Madde:22-Yirminci madde dolayısıyla kayıtları terkin edilenlerin yeniden kabulleri için kaydiye ücretinden maada bakayalarının dahi tamamen tesviyesi meşruttur. İşbu azâ kıdem sırasındaki numaraları dahi kaybederler.

Madde:23-Kulüp azâ-yı mevcudesinin yüzde onu [10/100] nispetinde meccâni olarak azâ-yı aslî kabul edilebilir. Şu kadar ki meccâni olarak kabul edilecek azaların taahhüdâtını ifaya muktedir olmadıkları heyet-i idarece tayin etmiş bulunmalıdır.

Madde:24-Her üç aylık devre nihayetinde heyet-i idare kulübün muvazene-i maliyesini tetkik eder. Ve hesâbâtı reis ve veznedar imza ve mühür-i resmi ile temhir eder.

Madde:25-Kulübün senelik bütçesi heyet-i idarece her sene başında [Kânun-ı sâni bidâyetinde] tespit edilir.

Madde:26-Veznedârdan veya bir mezuniyetnâme ile memur ettiği tahsildarlardan mâada hiçbir kimse her ne nam ile olursa olsun azâdan para tahsiline memur değildir.

Madde:27-Tahsilat mukabilinde veznedarın imzasıyla kulüp resmi mühürünü hâvi cilt ve sıra numaralı dip koçanlı bir matbu makbuz itâsı şarttır. Ve kırk kuruşu tecavüz eden her masraf için alel-usûl tertip edilmiş pullu makbuz verilmek lazımdır. Dip koçanları tahsilâtı yapan tarafından imza ve imla olunur.

Madde:28-Heyet-i idare kararına iktirân etmeksizin ve karara tevfiikân reisin itâ emri lâhık olmaksızın hiçbir para tediye edilemez. Aksi takdirde tediye yapacak zâmin olur mesele-i müstacelede bilâhare heyet-i idareye tasdik ettirilmek üzere reis on liraya kadar masârif-ı ihtiyârına müsaade edebilir.

Madde:29-Veznedar nezdinde yirmi beş liradan fazla para bulunduramaz. Yirmi beş liradan fazla olan miktarı bir bankaya tevdi etmekle mükelleftir.

Madde:30-Para bankadan reis ve veznedarın müşterek imzaları ile alınabilir.

Madde:31-Müsâmereler hasılâtı için varidât ve masârifâtı gösterir evrâk-ı müsbitesine merbût bir hesap pusulası tanzim ve heyet-i tertibiye reisiyle veznedar tarafından imza olunduktan sonra hâsilât-ı safiye veya zarar bir kalemde kasa defteri irâd veya masrafına kayıt ve müsamere hesap pusulası ile evrak-ı müsbitesi musannefine derç olunur.

Madde:32-Bil-umûm tahsisât bordroları musannefe vaz edilmeden evvel lâakall [en az] beş gün müddetle kulüp merkezinde cam altında bulundurulup efkâr-ı umûmiyeye arz olunur.

Madde:33-Kulübün hiçbir hesabına eşhâs lehine masârif derç edilemez. Bu gibi masârif ihtiyar için heyet-i idarenin esbâb-ı fevkaladeye müstenid sülûsân ekseriyetle verilmiş bir kararın lâhık olması şarttır.

Madde:34-Kulübün birinci takımları azasının formalarıyla çorapları ve kulübün sia-i maliyesi müsait olduğu takdirde futbol fotinleri isti'mâli birinci takım azalarına münhasır ve resmi müsabakalara ait olmak şartıyla, kulüp tarafından temin olunur. Kulüpte muhafaza edilecek olan bu eşyadan mâada azaya eşya mubayaası caiz değildir.

Madde:35-Bil-umûm müsamereler hasılâtının heyet-i tertibiyeler tarafından derhal vezneye yatırılması şarttır.

FASL: 3

İdmân ve Mümâresât

Madde:36-Kulübün idman faaliyeti spor şubeleri heyetleri tarafından temin edilir.

Madde:37-İstanbulspor Kulübü milli oyunlarla garpta tatbik edilmekte olan sporların kâffesini programına ithal etmek emelindedir. Bu sporların ciddi bir surette icralarına imkân hasıl oldukça tatbiklerine ibtidâr edilecektir.

Madde:38-Her şubenin azası kendi kaptanlarına idman ve müsabakalara ait hususâtta itâat-ı kâmile ile mükelleftir.

Madde:39-Senede lâ-akall bir kere kulübün spor şubeleri meyanında müsabaka imtihanları icra edilip o sene için "İstanbulspor Kulübü" birincilikleri tayin olunur.

KONGRE

Madde:40-Kongre her sene Kanûn-ı sâni bidâyetinde içtima eder.

Madde:41-Kongrenin içtimasında ekseriyetin mevcudiyeti şarttır. Bu ekseriyet ilk içtimada temin edilemediği takdirde ikinci içtimadaki mevcutla iktifa olunur.

Madde:42-Müsta'cel ve mühim hususât için azadan lâ-akall elli kişinin tahriri talebiyle heyet-i idare kongreyi fevkalade olarak içtimaa davet eder.

Madde:43-Gerek alelade ve gerek fevkalade kongre içtimaları lâ-akall on gün evvel matbuât ile ilan olunur.

Madde:44-Şube içtima-ı umumileri kongreden iki hafta evvel akd olunup zabt hulasaları kongrede okunur.

Madde:45-Kongrenin rûznâme-i müzâkerâtı ber-vechi atidir [aşâğıdadır]:

- 1- Zabıt-ı sabıkın [eski tutanakların] kiraet ve tasdiki,
- 2- Mali ve idari ve fenni raporların kiraeti,
- 3- Hesâbât müfettişlerinin raporlarının tetkikiyle hesâbâtın kabulü ve heyet-i idarenin ibrası,
- 4- Yeni heyet-i idarenin intihâbı,
- 5- Sene-i âtiye faaliyeti hakkında müdâvele-i efkâr,
- 6- Diğer tekâlifin müzakeresi.

FASL: 3

Mevâd-ı Mütferrika

Madde:46 -Hesâbât müfettişleriyle heyet-i tahkikiye memurları, meclis-i müessisin [kurucular] tarafından intihâb olunur.

Madde:47-Cemiyet emvâl-i gayr-i menkule tasarrufu hususunda, hususât-ı sâirede olduğu gibi Cemiyetler Kanunu ahkâmına, devletin sair ahkâm-ı mevzûasına bittabi riâyet edecektir.